

## FIQH IBADAH BAGI KANAK-KANAK: SATU TINJAUAN LITERATUR

Norul Huda binti Bakar  
Dzailqumar bin Hasan

### ABSTRAK

Kanak-kanak adalah amanah yang dipertanggungjawabkan Allah SWT kepada ibu bapa untuk memelihara dan mendidik sehingga menjadi manusia berguna. Berdasarkan al-Quran, Hadis dan perbincangan sarjana Islam muktabar, jelas menunjukkan bahawa kanak-kanak juga tidak terkecuali dalam melaksanakan tuntutan-tuntutan yang telah ditetapkan syarak. Bahkan ibadah yang dilaksanakan oleh kanak-kanak diterima oleh syarak dan bukannya sia-sia sahaja. Ditambah lagi, kanak-kanak di zaman kini dilihat mempunyai kematangan dalam berfikir dan bertindak lebih tinggi berbanding dengan kanak-kanak di zaman-zaman yang lain. Maka, penerapan ilmu dan praktikal agama terutamanya fiqh perlu ditanam sejak dari kanak-kanak bagi menyiapkan mereka menempuh alam selepas baligh dengan lebih bersedia dan mantap. Justeru itu, kajian ini akan mengupas dan menganalisis fiqh berkaitan kanak-kanak yang dibincangkan oleh sarjana Islam dalam aspek *ibadah*, *muamalah*, *munakahat* dan *jenayah*. Kajian ini mendapati kanak-kanak yang telah *mumayyiz* terlibat dan mempunyai implikasi hukum dalam aspek *ibadah* terutama dalam hal berkaitan solat, haji dan zakat.

Kata kunci : *Kanak-kanak, Fiqh Kanak-kanak, Fiqh Ibadah Kanak-kanak,*

#### 1.0 Pengenalan

Islam telah menjelaskan bahawa ibu bapa bertanggungjawab terhadap anak-anaknya. Seperti mana sabda Rasulullah SAW :

عَنْ عَبْدِ اللَّهِ بْنِ عُمَرَ رَضِيَ اللَّهُ عَنْهُمَا أَنَّهُ سَمِعَ رَسُولَ اللَّهِ صَلَّى اللَّهُ عَلَيْهِ وَسَلَّمَ يَقُولُ كُلُّكُمْ رَاعٍ وَمَسْئُولٌ عَنْ رَعِيَّتِهِ فَإِلِمَامٌ رَاعٍ وَهُوَ مَسْئُولٌ عَنْ رَعِيَّتِهِ وَالرَّجُلُ فِي أَهْلِهِ رَاعٍ وَهُوَ مَسْئُولٌ عَنْ رَعِيَّتِهِ وَالْمَرْأَةُ فِي بَيْتِ زَوْجِهَا رَاعِيَةٌ وَهِيَ مَسْئُولَةٌ عَنْ رَعِيَّتِهَا. متفق عليه.<sup>1</sup>

Maksudnya :

Daripada Abdullah bin ‘Umar bahawa beliau mendengar Rasulullah bersabda: “Setiap kamu adalah penjaga dan akan ditanya tentang jagaannya. Pemerintah merupakan penjaga dan akan disoal tentang jagaannya. Seorang lelaki adalah penjaga ahli keluarganya dan akan disoal tentang jagaannya. Seorang wanita di rumah suaminya adalah seorang penjaga dan dia akan ditanya tentang jagaannya.

Menurut al-Ghazali, anak-anak adalah amanah yang dipertanggungjawabkan kepada ibu bapa. Ibu bapa berperanan dan berkewajipan dalam memberi didikan agama sebaiknya kepada anak-anak terutamanya dalam hal berkaitan ibadah<sup>2</sup>. Ini kerana, pendidikan dan pengalaman yang diperoleh semasa kanak-kanak memberi pengaruh yang besar dalam kehidupan seseorang individu. Menurut Zakiah Darajat, individu yang menerima pendidikan

<sup>1</sup> Al-Bukhari. Sahih Bukhari. *Bab Karahiah al-Tatawalu ala al-Raqiq*. Hadis no. 2554.

<sup>2</sup> Al-Ghazali. 1996. *Bimbingan Mukmin*. Syed Ahmad Semait (terj.) Singapura: Pustaka Nasional.

agama secara formal dan tidak formal sejak kecil lagi mempunyai kecenderungan mengamalkan cara hidup beragama apabila telah dewasa kelak (Zakiah 1996).

Mendidik kanak-kanak dalam mendirikan ibadat solat adalah wajib<sup>3</sup>. Kewajipan mendidik kanak-kanak mendirikan solat bermula umur tujuh tahun dan harus memukul anak yang enggan solat apabila telah mencapai umur 10 tahun. Perkara ini disebutkan dalam hadis Nabi SAW yang berbunyi:

مُرُوا أَوْلَادَكُمْ بِالصَّلَاةِ وَهُمْ أَبْنَاءُ سَبْعِ سِنِينَ وَاضْرِبُوهُمْ عَلَيْهَا وَهُمْ أَبْنَاءُ عَشْرٍ

(رواه أبو داود)

Maksudnya:

Perintahkanlah anak-anak kamu mengerjakan sembahyang sewaktu mereka itu berumur tujuh tahun dan pukullah mereka kerana meninggalkannya sewaktu mereka itu berumur sepuluh tahun.

(Hadis riwayat Abu Daud)

Kewajipan mendidik kanak-kanak mengerjakan solat sepertimana yang dijelaskan dalam hadis Nabi SAW ini adalah supaya kanak-kanak itu mengetahui hukum-hukum ibadat tersebut dan terbiasa melaksana dan mendirikannya sejak dari awal-awal lagi (Abdullah Nasih Ulwan). Walaupun pada dasarnya kanak-kanak yang belum baligh sama ada lelaki mahupun perempuan tidak diwajibkan untuk menunaikan solat sebagaimana sabda Nabi SAW:

رُفِعَ الْقَلَمُ عَنْ ثَلَاثَةٍ عَنِ النَّائِمِ حَتَّى يَسْتَيْقِظَ، وَعَنِ الصَّبِيِّ حَتَّى يَحْتَلِمَ، وَعَنِ الْمَجْنُونِ حَتَّى يَعْقِلَ.

(رواه أبو داود)

Maksudnya:

Diangkat qalam (dilepaskan tanggungjawab perintah Allah) daripada tiga golongan; orang yang sedang tidur sehingga dia bangun, kanak-kanak sehingga dia baligh dan orang gila sehingga dia berakal (sedar). (Hadis riwayat Abu Daud)

Kanak-kanak zaman kini semakin bijak dan semakin pandai. Kanak-kanak ini disebut sebagai generasi Alfa atau gen-A iaitu kanak-kanak yang lahir sekitar tahun 2010 sehingga 2014. Kajian pakar sosiologi mengatakan bahawa Gen-A merupakan generasi yang paling terpelajar dalam sejarah generasi manusia. Kumpulan ini mula bersekolah seawal usia tiga hingga empat tahun dan menamatkan pengajian selewat umur 27 tahun. Ini kerana golongan itu merupakan anak kepada Generasi Y dan Z yang mempunyai pendapatan yang lebih stabil, bilangan anak yang sedikit dan pelbagai pilihan hiburan serta terdedah kepada kemajuan teknologi (Kosmo 2017)<sup>4</sup>.

Melihat situasi ini, persediaan dan pendidikan berkaitan ibadah secara serius harus diterapkan kepada anak-anak ini. Justeru, sebagai persediaan ke arah itu, kertas kerja ini dihasilkan bagi

<sup>3</sup> Abdullah Nasih Ulwan. 1984. *Tarbiyah al-Aulad fi al-Islami*. Kaherah. Dar -Al-Salam

<sup>4</sup> [www.kosmo.com.my](http://www.kosmo.com.my). 21 Jun 2017

memberi penjelasan dan panduan kepada ibu bapa bagi merealisasikan pendidikan anak-anak melalui ibadah.

## 2.0 Konsep Kanak-kanak menurut Pandangan Islam

Menurut Kamus Dewan edisi keempat kanak-kanak bermaksud budak lelaki atau perempuan yang masih kecil (biasanya yang belum berumur lebih daripada 7 atau 8 tahun)<sup>5</sup>.

Menurut perundangan dalam seksyen 2(1) Akta Kanak-Kanak 2001 menyebut bahawa kanak-kanak bermaksud seseorang yang di bawah umur lapan belas tahun<sup>6</sup>.

Manakala kanak-kanak dalam kebanyakan kitab-kitab fiqh menyebutkan kanak-kanak sebagai *al-sobiy* (الصبي) yang membawa maksud suatu ciri yang dikaitkan dengan seorang manusia semenjak kelahirannya sehinggalah dia bermimpi (baligh)<sup>7</sup>.

Kanak-kanak ialah seseorang yang belum lagi mencapai umur baligh<sup>8</sup>. Pertumbuhan diri kanak-kanak akan mengalami dua peringkat iaitu peringkat belum mumayyiz dan peringkat mumayyiz. Kedua-dua peringkat ini akan membezakan keahlian atau tanggungjawab kanak-kanak dalam menunaikan pelaksanaan agama.

### 1. Peringkat belum mumayyiz

Kanak-kanak yang belum sampai peringkat mumayyiz tidak dipertanggungjawabkan untuk melaksanakan tuntutan agama seperti solat dan puasa. Namun, bagi para ibu bapa atau penjaga adalah menjadi tanggungjawab berusaha menjinak-jinakkan mereka dengan hal-hal agama sebagai langkah melatih mereka sebelum mereka mumayyiz.

### 2. Peringkat mumayyiz

Peringkat ini bermula apabila kanak-kanak itu sudah mampu membezakan di antara sesuatu yang baik dengan sesuatu yang buruk. Tidak ada had umur yang tertentu dalam menentukan permulaan kanak-kanak mencapai tahap mumayyiz kerana pertumbuhan kejiwaan kanak-kanak itu tidak sama antara satu dengan yang lain walaupun pada kebiasaannya masa mumayyiz itu bermula pada umur tujuh tahun.

Para ulama Usul al-Fiqh membahagikan orang yang berkemampuan untuk melaksanakan hukum (أهلية الأداء) itu kepada dua iaitu orang yang berkemampuan untuk melaksanakan hukum tetapi masih kurang (أهلية الأداء ناقصة) dan orang yang berkemampuan untuk melaksanakan hukum secara sempurna (أهلية الأداء الكاملة). Kanak-kanak yang belum mumayyiz tidak mempunyai *ahliyyah al-ada'* dan amalannya juga tidak dikira secara hukum. Manakala kanak-kanak yang sudah mumayyiz tergolong dalam *ahliyyah al-ada' al-*

<sup>5</sup> Kamus Dewan Edisi Keempat. 2005. Kuala Lumpur: Dewan Bahasa dan Pustaka

<sup>6</sup> Akta Kanak-kanak 2001

<sup>7</sup> Abd. Aziz Ahmad. 2008. *Kasy al-Asrar An Usul Fakhru al-Islam al-Bazdawi*. Dar al-Kitab Al-Arabi. Beirut

<sup>8</sup> Alwi Abd Rahman. 1996. *Jenayah Kanak-kanak Menurut Undang-undang Islam*. Kuala Lumpur. Dewan Bahasa dan Pustaka.

*naqishah* kerana mereka sudah berakal dan mereka termasuk dalam golongan orang yang mampu melaksanakan hukum-hukum syarak walaupun tidak secara sempurna<sup>9</sup>.

Daripada penjelasan ini dapat dirumuskan bahawa *tamyiz* atau *mumayyiz* sebagai syarat untuk mengesahkan niat dalam penerimaan sesuatu amal ibadah. Seterusnya kertas kerja ini akan membincangkan tentang hukum hakam berkaitan ibadah yang melibatkan kanak-kanak.

### 3.0 Fiqh Ibadah Kanak-kanak

Menurut Imam Nawawi dalam kitabnya *al-Majmu'*, kanak-kanak yang mengerjakan amalan ibadah dikira sah dan dicatatkan pahala kerana amalan tersebut. Perbincangan tentang hukum-hakam ibadah yang melibatkan kanak-kanak adalah yang merangkumi ibadah solat, puasa, zakat dan haji<sup>10</sup>.

#### 3.1 Hukum-hakam Berkaitan Ibadah Solat Kanak-kanak

##### i. Kanak-kanak sebagai Imam Solat

Ulama' berbeza pendapat dalam menentukan hukum kanak-kanak menjadi imam solat. Jumhur ulama' yang terdiri daripada mazhab Hanafiah, mazhab Malikiyah dan mazhab Hanabilah meletakkan syarat *tamyiz* bagi menentukan sahnya imam solat dalam kalangan kanak-kanak. Bahkan solat yang diimamkan oleh kanak-kanak ini hanya dibenarkan dalam solat sunat sahaja, bukan dalam solat fardu. Berbeza dengan pandangan mazhab Syafi'iyah yang tidak meletakkan syarat *tamyiz* dalam hal kanak-kanak menjadi imam solat. Mereka berpendapat kanak-kanak *mumayyiz* boleh mengimamkan jemaah yang terdiri daripada golongan yang telah baligh sama ada dalam solat sunat mahupun solat fardu. Ini berdasarkan sebuah hadis :

عَمْرُو بْنُ سَلَمَةَ أَنَّهُ كَانَ يُؤْمُّ قَوْمَهُ عَلَى عَهْدِ رَسُولِ اللَّهِ صَلَّى اللَّهُ عَلَيْهِ وَسَلَّمَ وَهُوَ ابْنُ سِتِّ أَوْ سَبْعِ سِنِينَ.

Maksudnya:

Sesungguhnya 'Amru ibnu Salimah pernah menjadi imam kepada kaumnya dalam sembahyang pada zaman Rasulullah SAW semasa beliau berumur enam atau tujuh tahun.

Syeikh Ibnu Baz<sup>11</sup> dan Syeikh Ibnu Uthaimin<sup>12</sup> bersependapat dengan pendapat mazhab Syafiiyah dalam fatwa mereka.

##### ii. Kedudukan Kanak-kanak dalam Saf Solat Berjemaah

Dalam kitab Sahih al-Bukhari terdapat sebuah hadith yang menceritakan tentang cara Rasulullah SAW menyusun saf kanak-kanak dengan mengarahkan Anas bin Malik RA

<sup>9</sup> Abd. Karim Zaidan. 2006. *Al-Wajiz fi Usul al-Fiqh*. Muasasah al-Risalah. Beirut

<sup>10</sup> Al-Nawawi. 2008. *Kitab al-Majmu' Syarhu li al-Muhazzab al-Syairazi*. Dar Irsyad. Arab Saudi

<sup>11</sup> Abd. Aziz. 2008. *Majmu' Fatawa Ibnu Baz*. Dar al-Qasim. Beirut

<sup>12</sup> Mohamad Soleh Mohamad Uthaimin. 2010. *Fatawa Rasail Ibnu Uthaimin*. Dar Fatan. Syria

berada bersama-sama kanak-kanak kecil dan kemudian Rasulullah SAW solat bersama mereka<sup>13</sup>.

Al-Mawardi juga membincangkan perkara yang sama dalam kitab karangannya dengan berkata yang bermaksud :dan telah berkata sebahagian ashab kami, yang lebih utama itu adalah dengan meletakkan kanak-kanak (di dalam saf) di antara dua lelaki kerana lebih membawa kanak-kanak tersebut kepada mempelajari pergerakan-pergerakan solat<sup>14</sup>.

Berikut merupakan beberapa keadaan saf mengikut bilangan makmum dan jantinya.

Pertama: Jika seorang imam bersama dengan dua orang ataupun lebih dari makmum lelaki, ataupun di belakang imam tersebut terdapat seorang lelaki dewasa dan seorang kanak-kanak maka keduanya berada di dalam satu saf di belakang imam.

Kedua: Sekiranya seorang imam diikuti oleh dua orang makmum lelaki dan seorang perempuan, maka kedua orang lelaki tersebut berada dalam satu saf di belakang imam manakala perempuan tersebut berada di belakang keduanya.

Ketiga: Dalam keadaan ramainya makmum lelaki berserta perempuan dan juga kanak-kanak bersama imam maka kedudukan para makmum lelaki adalah di saf pertama atau kedua-dua saf yang paling hampir dengan imam. Kemudian kanak-kanak berada di belakang mereka. Manakala terdapat suatu pendapat di sisi para fuqaha bermazhab Syafie yang mengatakan bahawa diletakkan di antara dua orang lelaki dewasa itu seorang kanak-kanak supaya dia dapat mempelajari pergerakan-pergerakan solat<sup>15</sup>.

Berdasarkan penjelasan di atas, dapatlah difahami bahawa solat kanak-kanak yang sudah mumayyiz adalah sah kerana kanak-kanak itu dikira sudah berakal dan berkelayakkan melakukan solat. Sama ada dilakukan secara bersendirian, menjadi makmum atau menjadi imam .

### 3.2 Hukum berkaitan Ibadah Puasa Kanak-kanak

Ibadah puasa tidak diwajibkan ke atas kanak-kanak sehingga mencapai umur baligh. Namun begitu, kanak-kanak dianjurkan untuk berpuasa agar mereka terlatih dan terbiasa. Kebanyakan ulama' menyamakan anjuran melaksanakan ibadah puasa dengan solat kerana kedua-duanya adalah ibadah secara amali. Akan tetapi, ibadah puasa lebih berat dan memerlukan kekuatan dan kemampuan untuk menahan lapar dan dahaga<sup>16</sup>.

Menurut Syeikh Ibnu Utaimin, galakan berpuasa kepada kanak-kanak perlu dilakukan oleh kedua ibu bapa bagi memudahkan kanak-kanak ini berpuasa apabila telah mencapai umur baligh kelak. Bahkan didikan berpuasa sebelum usia baligh ini juga merupakan amalan para sahabat Rasulullah SAW<sup>17</sup>. Namun demikian, ibu dan bapa tidak boleh memaksa dan mengenakan ukuman rotan dengan kekerasan sekiranya kanak-kanak ini tidak mahu berpuasa seperti mana yang disuruh.

<sup>13</sup> Sahih al-Bukhari. *Kitab al-Solat. Bab Solat 'ala al-Hasir*. No. Hadith (380).

<sup>14</sup> Al-Mawardi. 1994. *Al-Hawi Kabir*. Dar Kitab al-Ilmiah. Kaherah

<sup>15</sup> Wazir Al-Awqaf wa Syuun Al-Islamiah. 2010. *Mausu'ah al-Fiqhiyyah al-Kuwaitiyyah*. Dar al-Salsil. Kuwait

<sup>16</sup> Ibnu Qudamah. 1997. *Al-Mughni*. Dar Alim al-Kitab. Kaherah

<sup>17</sup> Mohamad Soleh Mohamad Uthaimin. 2010. *Fatawa Rasail Ibnu Uthaimin*.

### 3.3 Hukum Berkaitan Ibadah Zakat Kanak-kanak

Para ulamak telah sepakat tentang wajibnya zakat ke atas harta seorang muslim yang baligh dan berakal namum mereka berbeza pandangan tentang harta milik kanak-kanak yang belum baligh. Jumhur ulamak (terdiri dari Imam Malik, Imam Syafi'ie, Ahmad, 'Ata', Mujahid, az-Zuhri dan sebagainya) berpendapat, wajib dikeluarkan zakat dari harta mereka.

Pendapat kedua daripada Imam Abu Hanifah dan sahabat-sahabatnya berpendapat, zakat yang wajib dikeluarkan dari harta kanak-kanak hanyalah bagi harta pertanian dan buah-buahan sahaja, tidak bagi harta-harta dari jenis yang lain.

Pendapat ketiga daripada Imam Abu Jaafar, as-Sya'bi dan an-Nakha'ie berpandangan, keseluruhan harta kanak-kanak dan orang gila tidak wajib dikeluarkan zakat.

Pendapat yang kuat menurut Yusuf al-Qaradhawi ialah pandangan jumhur. Oleh demikian, harta milik kanak-kanak dalam kalangan orang Islam wajib dikeluarkan zakat sama ada harta itu berupa haiwan ternakan, tanaman dan buah-buahan, perniagaan, wang simpanan dan sebagainya. Pihak yang bertanggungjawab mengeluarkan zakat bagi pihak kanak-kanak ialah wali atau penjaga mereka<sup>18</sup>.

### 3.4 Hukum Berkaitan Ibadah Haji Kanak-kanak

Ibadah haji yang dilaksanakan oleh kanak-kanak dikira sah ibadah tersebut. Ibadah haji yang dilakukan oleh kanak-kanak ini dikira sebagai ibadah sunat dan wajib ke atas kanak-kanak ini melaksanakan haji fardhu apabila dia sudah baligh. Ini adalah berdasarkan hadith berikut:

Daripada Ibn Abbas RA Nabi SAW bersabda:

إِذَا حَجَّ الصَّبِيُّ فَهِيَ لَهُ حَجَّةٌ حَتَّى يَعْقِلَ، وَإِذَا عَقَلَ فَعَلَيْهِ حَجَّةٌ أُخْرَى

Maksudnya:

Apabila seorang kanak-kanak menunaikan haji maka baginya haji sampai dia berakal (baligh), maka apabila dia sudah berakal maka baginya haji yang lain (mengulangi haji).

Dapat difahami bahawa baligh merupakan syarat wajib kepada seseorang itu untuk melaksanakan ibadah haji dan ibadah haji bagi kanak-kanak tersebut dikira sebagai amalan sunat dan wajib bagi mereka untuk melaksanakan ibadah haji apabila mereka sudah baligh kelak.

Ibnu Qudamah mengatakan di dalam kitabnya: "Ibn Munzir berkata: Para ulama' telah bersepakat, bahawa kanak-kanak yang sudah menunaikan haji ketika masih kecil kemudian kanak-kanak tersebut sudah dewasa atau telah dimerdekakan maka wajib bagi mereka untuk menunaikan haji apabila mereka sudah memiliki kemampuan"<sup>19</sup>.

<sup>18</sup> Yusuf al-Qaradawi.1986. *Fiqh al-Zakah*. Muasasah al-Risalah. Beirut

<sup>19</sup> Ibnu Qudamah. 1997. *Al-Mughni*.

Bagi memastikan kesempurnaan ibadah haji kanak-kanak tersebut, wali atau ibu bapa perlu melakukan kerja-kerja haji bagi kanak-kanak tersebut disebabkan kemampuan dan kudrat kanak-kanak tersebut yang diluar kemampuannya dan kerja-kerja haji tersebut adalah seperti berikut:

#### 1. Niat

Bapa atau wali hendaklah berniat dalam hatinya dengan menjadi anak tanggungannya berihram.

Lafaz niatnya : “Sahaja aku mengerjakan Haji atau Umrah atau Haji dan Umrah untuk anakku/tanggunganku dan aku berihram dengannya kerana Allah SWT”.

#### 2. Menyempurnakan rukun dan wajib Haji

Anak tanggungan itu hendaklah dibawa bersama untuk berwuquf, bermabit di mudzaliifah dan mina serta dicukurkan atau bergunting. Walaubagaimanapun, bapa atau walinya perlu menyelesaikan tawaf untuk dirinya terlebih dahulu sebelum mengerjakan tawaf untuk anak atau tanggungan yang dibawa bersama. Hal ini juga sama seperti bersa'ie dan melontar jamrah iaitu bapanya wajib mengerjakan untuk dirinya terlebih dahulu.

#### 3. Penjagaan Larangan Ihram.

Bapa atau wali wajib menjaga anak atau tanggungan dari melakukan perkara-perkara yang dilarang semasa ihram. Jika kanak-kanak yang belum mumayyiz melakukan perkara-perkara yang dilarang di dalam ihram, maka tidak dikenakan dam. Akan tetapi, sekiranya kanak-kanak tersebut sudah mumayyiz maka wajib disempurnakan dam tersebut. Bayaran dam boleh diambil daripada harta kanak-kanak tersebut jika ada, sekiranya tidak ada, maka bayaran tersebut akan diambil daripada harta bapa atau walinya<sup>20</sup>.

#### 4.0 Kesimpulan

Kanak-kanak yang belum baligh terlepas daripada sebarang betuk pertanggungjawaban agama terutama yang melibatkan ibadah. Namun, amalan yang dilakukan oleh kanak-kanak sah disisi agama dan dikira sebagai amalam baik. Maka, perlu diterapkan kepada kanak-kanak ini perkara berkaitan ibadah supaya mereka terbiasa dan mudah melaksanakan ibadah apabila telah mencapai umur baligh.

Ditambah dengan perubahan zaman dan pola pemikiran zaman kini ibu bapa perlu memberikan didikan melalui ibadah secara komprehensif agar anak-anak ini terbina akhlak dan sahsiahnya menurut dan menepati kehendak syarak.

#### 5.0 Rujukan

Abdullah Nasih Ulwan. 1984. *Tarbiyah al-Aulad fi al-Islami*. Kaherah. Dar -Al-Salam

Al-Ghazali. 1996. *Bimbingan Mukmin*. Syed Ahmad Semait (terj.) Singapura: Pustaka Nasional.

---

<sup>20</sup> Zulkifli Mohammad al-Bakri. [www.muftiwp.gov.my](http://www.muftiwp.gov.my). Hukum Kanak-kanak mengerjakan haji. 6 Disember 2018

- Abd. Aziz Ahmad. 2008. *Kasy al-Asrar An Usul Fakhru al-Islam al-Bazdawi*. Dar al-Kitab Al-Arabi. Beirut
- Alwi Abd Rahman. 1996. *Jenayah Kanak-kanak Menurut Undang-undang Islam*. Kuala Lumpur. Dewan Bahasa dan Pustaka.
- Abd. Karim Zaidan. 2006. *Al-Wajiz fi Usul al-Fiqh*. Muasasah al-Risalah. Beirut
- Al-Nawawi. 2008. *Kitab al-Majmu' Syarhu li al-Muhazzab al-Syairazi*. Dar Irsyad. Arab Saudi
- Abd. Aziz. 2008. *Majmu' Fatawa Ibnu Baz*. Dar al-Qasim. Beirut
- Al-Mawardi. 1994. *Al-Hawi Kabir*. Dar Kitab al-Ilmiah. Kaherah
- Ibnu Qudamah. 1997. *Al-Mughni*. Dar Alim al-Kitab. Kaherah
- Kamus Dewan Edisi Keempat. 2005. Kuala Lumpur. Dewan Bahasa dan Pustaka
- Mohamad Soleh Mohamad Uthaimin. 2010. *Fatawa Rasail Ibnu Uthaimin*. Dar Fatan. Syria
- Wazir Al-Awqaf wa Syuun Al-Islamiah. 2010. *Mausu'ah al-Fiqhiyyah al-Kuwaitiyyah*. Dar al-Salsil. Kuwait
- Yusuf al-Qaradawi. 1986. *Fiqh al-Zakah*. Muasasah al-Risalah. Beirut
- Zakiah Darajat. 1987. *Ilmu Jiwa Agama*. Jakarta. Bulan Bintang.